

樂陵縣鄉土志卷之二

政績錄

親民之官自古為重昔何最不願為臺閣願為劇縣以其惠易及民耳邑自東漢迄六朝皆郡治其間賢太守概不乏人若西晉之邵續北齊之房公其顯著者也隋唐而降湮沒不傳至有明紀載較詳茲就舊志所已載與所未載者採錄其事蹟紀之於篇俾後之來者觀感焉志政績

漢

龔遂山陽人宣帝時為渤海太守時邑屬渤海郡

事詳漢書本傳

周磐字堅伯汝南安城人少遊京師學古文尚書洪範五行左氏傳

樂陵縣鄉土志 卷二

五

好禮有行非典謨不言諸儒宗之和帝初拜謁者除任城長遷陽夏重合令今邑內有遺蹟皆有惠政建元元年七十三歲夢先師東里先生與己講於陰堂之奧遂無病而終右採錄後漢書

魏

陳矯字季弼廣陵東陽人魏武時辟為樂陵太守文帝嘗稱之曰陳季弼臨大節明略過人信一時之俊傑也

韓暨字公至南陽人避亂魯陽山魏武辟為丞相曹屬後遷樂陵太守徙監冶謁者所至皆稱職年踰八十進爵為司徒史稱之曰處以靜居行化出以任職流稱以上二人採錄三國志

晉

邵續字嗣祖魏郡安陽人樸素有烈志懷愍時王浚領幽冀假續綏
集將軍樂陵太守屯厭次以續子乂為督護綏懷流散多歸附之後
以孤危無援權附石勒勒以乂為督護既而段匹磾在薊遺書邀續
俱歸晉其下諫曰今棄勒歸匹磾任子危矣續垂泣曰我出為國豈
得顧子而為叛臣哉遂絕勒勒殺乂元帝以續為平原太守後復為
勒所執不屈而死

右採錄
晉書

北魏

李淑虎渤海人好學博聞有識度太和中為本國中正攝樂陵中正
蓋郡佐也性清直有公平之譽

右採錄
魏書

蘇淑字仲和武邑人熙平中除樂陵內史清心愛下有民譽後謝病

歸吏民老幼訴留者甚衆齊獻武追美清操詔賞穀帛當時稱為良
二千石

採錄南北史

北齊

房豹字仲幹清河人體貌魁岸美丰儀釋褐開府參軍兼行臺郎中
遷樂陵太守鎮以凝重哀矜貧弱階庭簡靜囹圄空虛郡治濱海水
味多鹹苦豹命鑿一井得甘泉人謂政化所致

高攸樂陵太守為政謹嚴凡守令參佐往來雖雞黍糧餉微事無不
周知時號神明

樂陵自漢迄六朝俱郡治舊志載為太守者二十有七人為立
傳者祇龔遂等六人茲僅載有傳者若重合令樂陵中正樂陵

內史三人亦依舊志載之

明

沙鵬宏治十三年由進士令樂陵飭容貌寡言笑人不敢干以私興賢育才庭無滯獄凡徭役催科莫不處置有方吏胥不得因緣為奸士民戴之

宋璉直隸清苑人宏治十三年由舉人任樂陵教諭耿介自持激揚士行教績卓然擢陝西道監察御史

許達字汝登河南固始人以進士令樂陵正德辛未劉七等為亂犯樂陵達督壯士張達連擊敗之擢兵備僉事守棣州及劉七等犯利津又率兵擊破之復追戰於海豐斬首數百級賊自是不敢入境論

樂陵縣鄉土志卷二

七

功轉江西副使宸濠反與孫燧同罵賊死

按舊志胡岳立許忠節公祠記略云崇禎甲申三月十九日李賊陷京師公廟肅然風起兩碑俱仆知公忠魂耿耿歷數百年而猶在云

王登庸文安人舉人萬厯間任樂陵令創修邑志十九年鉤盤河枯大加挑濬又教民樹藝相土宜棗遇民有過者計罪輕重量植棗樹以贖愆至今民受其賜

倪尚志直隸天津衛人萬厯間由舉人任樂陵知縣善政惠民仁聲載道歷五十餘年猶謳頌不置

馬經邦雲南蒙化人由舉人為樂陵令崇禎十年流寇猖獗人心騷

動經邦率士民協力守禦城賴以安歲大祲撫字多方人稱愷悌
舊志自洪武迄崇禎凡官本境者皆臚列其姓名而為立傳者
知縣則二十一人縣丞三人主簿二人典史三人教諭五人訓
導三人右採錄者知縣五人教諭一人

國朝

郝獻明萬全右衛人由順治乙未進士令樂陵性淡泊勤政事錢糧
羨餘以及臨德漕米擔頭陋例悉除之里書以荒作熟虛派地一百
二十頃獻明力為清正止存三十頃民至今感其德

李時謙字吉文淮安山陽人順治辛丑進士康熙七年令樂陵果毅
有為嘗修城東門樓以資捍禦甄陶士類多所成就蒞任三載擢湖

廣道監察御史上疏力陳康熙十六年前令履畝灑派之弊雖格於
部議而邑民感戴弗諼云

陳師孔字願菴福建閩縣人康熙乙丑由鄉舉令樂陵公體貌清癯
古氣岸然嘗遭耿逆之變不為屈赴官時正供外多雜稅民困之往
往失業師孔捐俸墊供力白上官多所罷除嘗作自警語書牌於馬
前云受一分枉法錢幽有鬼神明有憲作半點虧心事遠在兒孫近
在身可想見其梗概矣

姜植鑲藍旗人康熙二十五年由奉天府廕生令樂陵八載凡雜項
繁擾諸弊多所芟除民蒙其休

楊儉大興廩生康熙五十五年由教習令樂陵除莠民張五牛六牛

等人咸快之

張任字仁齋蓬萊人以兄倬為樂陵教諭卒於官任繼其缺數年不忍履學署恆假館以居性行淑均清介自持擢知縣累遷至河東運使

鄒璲四川人雍正間令樂陵時邑大水力請成災委查者多方阻駁璲請益力終得蠲賑

賈若瑚山西陽曲人貢生久歷學職於乾隆元年陞樂陵令嘗云吾居官惟欲化大事為小事化小事為無事蒞政二年清苦如寒士人稱長者

右採錄乾隆二十七年重修縣志為立傳者原十五人茲採錄

者僅八人

王謙益福建永春州人乾隆戊寅由進士令樂陵修邑乘建義學陶甄士類多所成就辛巳秋淫雨禾田盡萎謙益匹馬勘驗於泥淖中不辭勞復申求蠲緩民獲蘇時議濬馬頰河培高堤埝謙益兩牒上憲斬紓民力邑人至今感之

邵延曾順天大興人乾隆癸卯舉人嘉慶七年任樂陵知縣蒞任七載勤政愛民尤以尊禮名賢為主慕張中丞發董通判養性之為人皆再謁其墓文昌閣西偏舊有九賢祠又訪求賢士得潘體震張鏐增入為十一賢焉

宗元醇字筱棠河南魯山縣人道光間由進士令樂陵性仁慈理訟

事每答人以袖自蔽其面創建考院額其堂曰采珊堂文廟圯又倡修之假歸後仕至順天府尹

劉醇字果田直隸天津人道光末由進士令樂陵性寬和保正多奸猾前令催科率力比醇以仁慈馭之亦無敢玩先後宰樂陵累次均有劉寬雅量之稱水災多請蠲緩工草書人得其片紙如至寶

臧俊十字官虞諸城縣人咸豐間由舉人教諭樂陵以造就人才為急問業者門外屢常滿邑中科第多出其門居官儉約歲歉出學租蠲緩之同治間捻匪圍城急俊千佐令區畫城賴以完蒞任既久時遊郊外與父老子弟勸農桑講孝弟雖婦人孺子俱呼為臧夫子年逾七旬捐貲倡修聖廟工竣始告歸

范許珍字聘席浙江天台縣人光緒間由舉人令樂陵性和易尤愛士戊子秋闈邑士齊集省垣公始奉檄即解橐飲助其寒苦者月試書院及交卸猶捐貲二千緡存息作賓興費自撰堂楹云嗜好幸無他入仕宦場中未改寒酸本色經營多不果愧兩三年內難副父母尊稱其愛民養士之心可見矣

乾隆二十七年以後官本境者不乏循良茲採錄者知縣四人
訓導一人

按穀梁子有言民勤於力則工築鮮民勤於財則貢賦少民勤於食則百事廢牧令者親民之官首在勤求民隱而以清慎行之興一利而民不以為勞除一弊而民不以為刻民者可與圖

成難與圖始任勞任怨則德化存乎其間詩曰愷悌君子民之
父母有責者當三復斯言

樂陵鄉土志卷之二

兵事錄

王公設險以守國於是乎武備講焉况樂陵渤海雄封富平舊鎮北控津沽滄鹽勁健之區蔽其後南達濟清商濟衝繁之路當其前東接埕口以陽海為藩屏西連德衛以甯吳為險要歷代戰爭之事可得而考也志兵事

漢

宣帝地節中渤海盜起以龔遂為太守治之

時樂陵屬渤海郡

東漢

光武建武五年春大司馬吳漢率耿弇擊富平賊徐少獲索賊師古

樂陵縣鄉土志卷二

十二

於平原大破之

富平即樂陵

安帝永初四年渤海平原劇賊劉淵周文光等攻厭次殺縣令青州

刺史法雄破之

厭次即樂陵

桓帝延熹八年渤海盜蓋延作亂未幾伏誅

獻帝初平二年冬黃巾賊張角寇渤海公孫瓚追擊大破之

晉

懷帝永嘉元年五月馬牧帥汲桑聚眾反殺前幽州刺史石勒於樂陵進掠平原冬十二月并州人田蘭等殺桑於樂陵平之

愍帝建興四年石勒襲邵續於樂陵續盡眾逆戰大破勒兵後石勒遣石季龍擊段文鴛於樂陵破之生擒文鴛段匹磾遂率其屬降於

勒

隋

煬帝大業九年冬渤海賊格謙自號燕王孫宣雅自號齊王擁衆十餘萬山東苦之格謙厭次人十年為王世充所滅十三年竇建德據渤海之地自稱長樂王國號夏為唐所滅

明

武宗正德六年六月賊首王佑盧秀糾結惡少自稱埽地王掠樂陵知縣許達督民兵擊之追至王家莊凡兩戰撲賊衆殆盡既而巨寇劉六劉七齊彥名楊內官等兵大起薄樂陵城下許達令街巷築墉高出檐上每三家穴一竇以壯夫持刀守之開城延寇賊野無所掠

樂陵縣鄉土志卷二

十三

窺城無所見垣高又不能縱火疑不敢入達命義士張達領兵千餘人大破之斬首五百餘級楊內官斃焉次年春賊益兵復來又連破之

莊烈帝崇禎十年流寇亂知縣馬經邦守禦甚固十五年亂兵陷樂陵外濠殺傷千餘人城未破而去

國朝

咸豐三年粵逆北犯直沽處處土匪蠢動滄鹽回梟嘯聚千餘人焚掠境北舊縣鎮一帶邑紳前懷慶府知府鄭榮奉命辦武定屬團練與邑紳直隸知縣李熙載號召團勇會同滄鹽二令圍賊於小梁山擒賊首二十餘名餘黨解散邑獲以安九年杜翮為山東團練大臣

邑匪藉抗糧為名嘯集萬餘盤踞城東鐵家營一路南連商惠土匪北通滄鹽回匪焚掠攻城杜大臣復調李熙載練團剿之連獲羽黨多名匪未得逞同治元年東撫委童道督兵會剿轉戰皆捷逆首遂北竄至天津就擒械送山東正法傳首樂陵事詳張勤果軍興紀略同治七年夏捻匪張總愚擁眾十餘萬由陝渡河犯畿南為官兵所扼遂南下連陷南皮鹽山慶雲海豐等縣犯樂陵橫亘三十餘里團紳鄭凱元率民兵數千扼之於城西韓家莊民兵潰抵城下知縣王元相率官紳竭力守禦賊遂南去阻濟河不得渡復北竄往來樂陵蹂躪四五次鄉民築圩自保邑紳賈亨嘉督團捍禦於北境東竄至鄭家廟邑紳鄭述宏截之斃賊七百餘人奪其旗纛器械馬匹事平

保獎有差

光緒二十六年夏拳匪煽亂鹽山南皮一帶延及樂陵北境六月匪千餘據黃夾鎮統帶張奉先孟恩遠竭力堵擊槍斃數名遂遁去旋引眾謀焚朱家寨教堂知縣何業健會孟恩遠擊之於王家寨西北槍斃匪九名匪眾兵單翌日教堂卒被燬是年十月西軍由津南下至鹽山邑民紛逃適淮軍南潰經樂陵大肆劫掠張奉先出隊彈壓斬兵目一名遂西出境

按樂陵地屬偏隅民心樸厚揭竿伏莽之事無聞焉然北徧滄鹽東連陽海回臬海盜時而出沒近今以來若粵匪若捻匪若拳匪皆由北境侵入而以三間堂舊縣鎮為之扼要倘非憑險

設備捍禦有方則由樂南下勢成燎原大河以北徧受其殃矣有責者不可不留意也